

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 17/2

19 հուլիսի 2016թ.

Քննարկվեց «Մելիոգրուպ» ՍՊԸ գանգատը շրջանառության հարկի դաշտում գործունեություն իրականացնելու վերաբերյալ:

«Մելիոգրուպ» ՍՊԸ գանգատում բերված փաստարկները.

«Մելիոգրուպ» ՍՊԸ-ն գրանցվել է պետական ռեգիստրում 30.11.2015թ. և 3 օր հետո դիմել է ժամանակավոր դադարի համար, քանի որ գործունեություն առայժմ չէր իրականացվելու: 17.06.2016թ. ընկերությունը դիմել է գործունեությունը վերսկսելու համար՝ ցանկանալով աշխատել շրջանառության հարկի դաշտում: Սակայն հարկային մարմինների կողմից ստացվել է մերժում՝ պատճառաբանելով, թե իբրև ընկերությունը ստացել է նամակ շրջանառության հարկով աշխատելու ընթացակարգի դիմելու վերաբերյալ: Ի պատասխան այն բանի, որ նման նամակ գանգատաբերը չի ստացել, նրան ցույց է տրվել փոստային մարմնից ստացված ծանուցման վրա դրված ստորագրությունը:

Գանգատաբերը հայտնում է, որ ստորագրությունն իրեն չի պատկանում և այդ ծանուցումը տեսնում է առաջին անգամ:

Ելնելով վերոգրյալից՝ գանգատաբերը խնդրում է չեղարկել այդ ծանուցումը և հնարավորություն ընձեռել ընկերությանը շրջանառության հարկի դաշտում աշխատելու համար:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ «Մելիոգրուպ» ՍՊԸ-ն 17.06.2016թ. դիմել է հարկային տեսչություն՝ շրջանառության հարկի դաշտում գործունեություն իրականացնելու համար: Սակայն հարկային տեսչության կողմից դիմումը մերժվել է՝ պատճառաբանելով, որ այն ներկայացվել է ՀՀ օրենսդրությամբ սահմանված կարգի խախտմամբ:

Տվյալ դեպքում գործում առկա է ապացույց (ծանուցագիր), որը հավաստում է ընկերությանը սահմանված կարգով գործող ընթացակարգին ծանուցված լինելու մասին: Սակայն գանգատաբերը պնդում է, որ ծանուցագրի վրա դրված ստորագրությունն իրեն չի պատկանում:

Վերոգրյալի կապակցությամբ հարկ է նշել, որ «Շրջանառության հարկի մասին» ՀՀ օրենքի 4-րդ հոդվածի 1-ին մասի համաձայն. «Հայաստանի Հանրապետությունում շրջանառության հարկ վճարող կարող են համարվել սույն հոդվածի 2-րդ մասով սահմանված պայմանները բավարարող Հայաստանի Հանրապետության ռեզիդենտ համարվող առևտրային կազմակերպությունները, անհատ ձեռնարկատերերը և

նոտարները, այդ թվում՝ նոր ստեղծված (պետական գրանցում ստացած կամ հաշվառված) հարկ վճարողները (այսուհետ՝ անձինք), բացառությամբ սույն հոդվածի 3-րդ մասում նշված դեպքերի՝

1) յուրաքանչյուր տարվա հունվարի 1-ից մինչև այդ տարվա ավարտը (բացառությամբ օրենքով նախատեսված՝ տարվա ընթացքում ԱԱՀ վճարող համարվելու դեպքի), եթե մինչև այդ տարվա փետրվարի 20-ը իրենց հաշվառման վայրի հարկային մարմին են ներկայացրել վերադաս հարկային մարմնի ղեկավարի հաստատած ձևով շրջանառության հարկ վճարող համարվելու վերաբերյալ հայտարարություն. »:

Իր հերթին, «Շրջանառության հարկի մասին ՀՀ օրենքում փոփոխությունների և լրացումներ կատարելու մասին» 21.06.2014թ. ՀՕ-128-Ն ՀՀ օրենքի 10-րդ հոդվածի համաձայն՝ շրջանառության հարկ վճարող համարվելու վերաբերյալ հայտարարություն ներկայացնելու վերջնաժամկետը կիրառվում է միայն այն դեպքում, եթե հարկային մարմինը հարկ վճարողին ծանուցել է օրենքով նման վերջնաժամկետ սահմանված լինելու մասին: Եթե հարկային մարմինը նշված ծանուցումը հարկ վճարողին ուղարկում է շրջանառության հարկ վճարող համարվելու վերաբերյալ հայտարարություն ներկայացնելու համար օրենքով սահմանված ժամկետներից հետո, ապա որպես շրջանառության հարկ վճարող համարվելու վերաբերյալ հայտարարության ներկայացման վերջնաժամկետ սահմանվում է հարկ վճարողին ծանուցումը տրամադրելու օրվան հաջորդող 7-րդ աշխատանքային օրը:

Տվյալ դեպքում Նոր Նորքի հարկային տեսչությունը փոստային ծառայության միջոցով «Մեխոգրուպ» ՍՊԸ-ին ծանուցել է օրենքով նման վերջնաժամկետ սահմանված լինելու մասին: Մասնավորապես, համաձայն փոստային ծառայության ծանուցագրի, վերոգրյալ իրավանորմով նախատեսված ծանուցումը հասցեատերը ստացել է 10.12.2015թ-ին: Այսինքն, հարկային մարմինը սահմանված կարգով կատարել է իր վրա դրված պարտավորությունը:

Ինչ վերաբերվում է գանգատում բերված այն պնդմանը, որ փոստային ծառայության ծանուցագրի վրա դրված ստորագրությունը գանգատաբերին չի պատկանում, ինչպես նաև գանգատով բերված պահանջին՝ փոստային ծառայության ծանուցագիրը չեղարկելու վերաբերյալ, ապա հարկ է նշել, որ ծանուցագիրը ստորագրած անձի ինքնության որոշման և ծանուցագրը չեղարկելու իրավասությամբ հարկային մարմինն օժտված չէ:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

«Մեխոգրուպ» ՍՊԸ գանգատը մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ



Վ.ՄԻՐՈՒՄՅԱՆ